

कोरिन्थीरालाई

पावलए छीनीकाव परींद ओरायो चिथी

पावलए कोरिन्थ सहरलाव मन्दलीलाई उस०कताव चिथी परींद ओरायो छीनी छुत चिथी मनी तोबो सर्द याएक्यो। नो चिथील कोरिन्थीराए यायुं क्य़ाके काना लिद ओसोगोए फरी छीनी आव चिथी सर्द याएक्यो (२ कोरिन्थी २:३-४; ७:८-९)। भन रूवा रूवा धुतनी पैज़्यावराए पावलए ओपाँलाई सज़िम्द बलेदचाव यापैज़्याव (११:४-५; १२:११)। है जैद आव चिथील नोराए जूनी पावलए परमेस्वरनिकाव ओदैव हक सतैंद ओरायो सरै:सिउ लिज़्या (१०:१-१२:१०)। पावल कोरिन्थीराए याल्योदा ओमाहुद यरूसलेमलाव गरीबराए जूनी भिती दुप्द ओनैरक लिन्या मनी सरै:सिउ लिज़्या (९:३-५)।

१ डा पावल, परमेस्वरए ओखतै-
नाव येसु ख्रीसए ओसाची,
सोनो ड़ास लिज़्याव गेभाइ तिमोथीस
गिन्ल्योनी कोरिन्थलाव परमेस्वरए
ओमन्दलीलाई सोनो अखैया खन्द-
लाव छैव उमीं भरिरालाई आव
चिथी परींद गिन्याचिज़्या। २परमेस्वर
गेबाबु सोनो गेप्रभु येसु ख्रीसनी
जेल्योदा नियुं गराँद जेयुं होलाँ जैद
ओयाचिरक।

युं होलाँ जैदचाज़्याव परमेस्वर

३गेप्रभु येसु ख्रीसए ओबाबु
परमेस्वरए उमिन बनै ओघ्यो:क। नो
गेल्योदा उयुं नाज़्याव गेबाबु ज़, गेयुं
होलाँ जैदचाज़्याव गेपरमेस्वर मनी
ज़। ४नोए गेदुख भरिल गेयुंर होलाँ
जैद ओयासिज़्यावए गे मनी हितावनी
ज़ छुतरालाई यादुखराल यायुंर
होलाँ जैदचाद यायुंर सभै:दचान्यार

ताव परिके। ५गे ख्रीसए उमिनताव दुखर खा गेदैऽया, हाःज ख्रीसए उमिननी परमेस्वरए गेयुँर होलाँ जैद यासिऽयाव। ६गे परमेस्वरए ओपाँ सथैऽयावराए उमिनताव गेदैऽयाव दुखर जेजूनी ज़। जे ननी ज़ अजम्बरी जुनील बान्या येम ब जेदैके। हिताव ज़ नो गेदैऽयाव दुखराल परमेस्वरए गेलाई गेयुँर होलाँ जैद ओयासिऽयावए जेलाई मनी निताव दुखर जेदैक जेयुँर सघ्योःदचाद सहिधुन्यार जैचिऽयाव। ७है जैद गे ननी ज़ जेल्योदा गेयुँ हुबो लिऽया। कैताराक जे मनी गे गेदैऽयाव मिताव दुखर जेदैक, गे किताव गेदुखराल गेयुँर होलाँ ओताऽयाव, जे मनी गेस सिप ज़ जेयुँर होलाँ ओताक।

८जे डानैँ डामेरं, डासकाव लिऽयाव-रास एसिया खन्दलाव गेदैव दुखर जे तखेप थैचिके। हो बेलाक नलावर गेखिरी यापसिक गे सही ज़ मासहिधुन्या दुखर दैद, 'अब ते सिन्या ज़ गेताके ब' लिद हार ज़ गेमनिके। ९नो दुखर अब ते डाथःरैके, गे ननी पुलुस्न्या काताए आस ज़ ओमाल्योए, गे गेक्याँत माःक, सिउरालाई सोचोइऽयाव परमेस्वरए ओक्याँत ख्यासिद ल्यो परीन्याए जूनी ची नै गेताव ओल्यो। १०गे निताव सिउल गनिसिउरालाई परमेस्वरए जोगोइद

निताव दुखरानी पाथस पलेःसिक्यो। आकिनी ब पलेःन्या ज़ ले लिद गेयुँ हुबो ज़ लिऽया। ११जे मनी गेलाई 'परमेस्वरए पाथस ओरानैवक' लिद पोखारिद धुरिदचाव ताके। हो ताकिन जेपोखारिउ परमेस्वरए थैद गेलाई असिक ओयासिऽयाव रँःद कुधुए गेजूनी धन्याबाद चरैःन्या लेर।

पावल कोरिन्थल हुन्या दिलो

ओदोव

१२आव तोबो पाँत गेसुनी च्याँःसिउ ज़ लिऽया, जेस सोनो छुतरासकाव गेदोव येन भरी छैँव युँनी सतस ज़ गेदोके लिद गेयुँ हुबो ज़ लिऽया। नो भरी आव मानुवाताव मिँराए बुद्धीनी गेदोव माःक, परमेस्वर गेल्योदा दाइनो ओतावए गेदोव ची। १३जे माप्रिधुन्या सोनो मातीधुन्या पाँर काता ज़ गेमासरे। है जैद डाआस आव ज़, १४जे गेलाई आःपै चबनै जेमाथःरैसिदी ब तछा गेयेन भरी थःरैद साचो ज़ ची ओल्यो लिद गेप्रभु येसु उहुन्या छचाम गे जेलाई रँःद गेलाज ओमाहुऽयाव मिताव जे मनी गेलाई रँःद जेलाज माहुन्यार जेताकिन ताखेहो है डालिऽया।

१५-१६डापाँ भरी तीद डालाई ब यायुँ हुप्खेहो ज़ लिद डा माकेदोनियादा बान्या थःरैद, डादा जेल्योक हुद

जेल्योलाव घ्याँ बान्या डाथऱैके। हो ताकिन आनी डाबाक ब, हुनी डाहुक ब यास नेखेप दैसिउ दैन्या डाले है डालिके। फरी ननी यहूदियादा ओल्द डाबाक मनी सघैनाऱ्या है ब डालिके। १७ खाली जेल्योदा हुव डामादैवए उकिला माल्यो मिताव ब जेरँःनाऱ्याखेहो। यातिर वाऱ्ज दोऱ्याव मिँराए होक ज़ हैज़ हैज़, होक ज़ माःक माःक है यालिऱ्याव मिताव ब जेथऱैःनाऱ्याखेहो। १८ है जेदाँदी ब ओल परमेस्वर सतस उलिऱ्याव मिताव डा डापाँ ब जेजूनी आव ताक्या, हो ताक्या है लिन्या स्यासो माले। १९गे सिलास तिमोथीरास जेलाई परमेस्वरए ओज़ा येसु ख्रीसए ओपाँ गेसथैचिउ भरी 'आव सैं हो सैं' है लिन्या ओमेला ज़ माले, परमेस्वरए ओल्योनिकाव साचो थ०रिउ पाँ ज़ याद गेनैचिए। २० परमेस्वरए भाःकिनकाव मिँ-रालाई ओरायो ग्राका भरी ब ओज़ाए ओक्याँत ओयो-व साचो ज़। है जैद गे मनी नो ओपाँलाई ओज़ाए उमिननी 'आमेन' है गेलिऱ्यावनी परमेस्वरए उमिन सघ्योःद गेएऱ्या। २१ जेलाई गेस सिप ज़ छाँतिद ख्रीसए ओक्याँत थ०रिउ जैऱ्याव मनी ओल परमेस्वरए ज़। २२ फरी नोए गेलाई 'डामीर ज़' लिद छाप भाःद बैनाए

जूनी गेयुँल छैव उपरूस ब याद नैसिउ।

२३ खास ते जेलाई डारिसनी जोगोइन्याए जूनी कोरिन्थल जेल्योक हुन्या डातेन्सिके। धुत डामापाँए, परमेस्वर साची लिऱ्या। २४गे जेलाई परमेस्वरए ओपाँत कर गेमालैचिए, काराव ल्यो ताकिन जे ज़ ओपाँत थ०रिउर जेलिऱ्या। गे गेयेन ते जेस तोबो ताद जेयुँर होलाँ जैदचान्या वाऱ्ज लिऱ्या।

२ है जैद डा जेल्योड हुद जेयुँर सुहुर्द डायचिऱ्याव देखा बुरू माबान्या पाथ लिऱ्या लिन्या डाथऱैके। २डा जेलाई डारिसए जेयुँर सुहुर्द डायचिकिन, नितावल जेकिन डालाई सुए ची डायुँर होलाँ जैद ओयोरिऱ्याव? ३ है जैद जे डालाई डायुँ होलाँ जैदचाव परिन्याराए 'डाहुक डायुँर माचाव जैद तायारक' लिद आवकिन नो डादाडाव चिथी डासर्क, डायुँ होलाँ ओताकिन जे जेयुँ ब होलाँ ताय लिद डायुँ हुपुद ओल्यो। ४ खाली नो चिथी डापरींऱ्याव बेलाक माचाव जेयेनत डायुँर घर्द डापिलर रास्द डार्सार सैःद डापरींके। नो डापरींव जेलाई जेयुँर केःदचान्याए जूनी माःक, बुरू जेलाई खा मया डादाचिऱ्याव हो घसैरक लिद डापरींव ची।

माचाव येन दोवलाई रास्न्या

५जेसकाव नो माचाव येन दोवए डा डायुँर माचाव जैद ओयाँकिन डालाई वाज़ माःक, जेलाई ते भन जेयुँर ब सुहुदर्चाचिखेहो। ६जे जाँकोसैए नोलाई जेयो सजा योःके। ७अब ते जे नोलाई ओगलतीनी रास्द उयुँर होलाँ जैदचाव ताके, मानी ओसोगोए उयुँर क़्यान्या ओछ्यास लिज़्या। ८है जैद जे नो मिँए ओल्योदा फरी जेयुँ ओनाव सतैदचाव ताके लिद जेलाई डाघलैचिज़्या। ९नो डादाडाव चिथील ब डापाँ यादोज़्याव सैं यामादोज़्याव लिद जेलाई जाँचिन्याए जूँनी डापरींव। १०नोलाई ओगलतीनी जेरास्किन डा मनी डारास्ज़्या। है जैद जेल्योडावर रास्सिन्या मितावर यालिकिन डा मनी जेजूँनी ख्रीसए ओयाँव हकनी डारास्ज़्या। ११मानी सैतान गेखार्ल पसिद बलेःन्या ओछ्यास ब ओल्यो। नितावल गे सैतानए ओचाल मासैंधुन्यार ते गेमाले।

पावलए उयुँ थू ओताव

१२ख्रीसए ओपाँ सथैन्याए जूँनी त्रोआस सहरल डालिज़्याक नलाव-रालाई ख्रीसए ओपाँ सथैन्या प्रभुए बनै चाव मौका जोरैदचाँक्यो।

१३खाली नल जेल्योनी हुन्या गेभाइ तीतसस गिन्मादैसिउए कै याताव लिद डायुँ थू ताद नलावरास बिदा निद माकेदोनियादा डाबाके।

परमेस्वरए ओपाँ गेक्याँत सतैसिउ

१४हैदी ब परमेस्वरलाई बनै धन्याबाद लिज़्या, गेलाई ओयेनत आदा होदा ओजैसिक भेंःस्याराए भेंःस्या ख्रीसलाई एकन्या गेस नैदचासिज़्याव। है जैद पो पोड गेनी परमेस्वरए ओपाँ चाव सी डरो माँःती राःसिनाज़्या। १५गे ख्रीसए ओपाँ गेरासथैक अजम्बरी जुनील बाज़्यावराए खार्ल तादी ब, नर्गल बाज़्यावराए खार्ल तादी ब, गे परमेस्वरलाई चरैःसिउ सी डरो स्यासोर गेलिज़्या। १६नो नर्गल बाज़्यावराए जूँनी चिची सी डरो स्यासोर गेलिज़्या। फरी नो अजम्बरी जुनील बाज़्यावराए जूँनी ते चाव सी डरो स्यासोर गेलिज़्या। गेनी निताव अचम्बलाव येन माबिरैद दान्यार सु ची गेलिज़्यावदा? १७हैदी ब गे निताव येन चबनै मासुदुंधुन्यार गेतादी ब ख्वा ख्वाराए यादोज़्याव मिताव परमेस्वरए ओपाँ अइज़ दुलैज़्याव मितावर ते गेमाले। गे ते परमेस्वरनी परींसिउ मिताव जैसिद ओल ओड़ाक

छैव युँस ख्रीसए ओसक्तीनी ओपाँ
गेरासथैऽया।

युँताव सर्सिउ पाँ

३ गे निताव गेपाँक, “गेड़ाक अइज
चाव जैसिद यासतैसिऽयाव
ताखेहो,” है तालिच्यो। गेलाई छुतराए
माँ:ती जेल्योदा गेहुदी ब जेल्योनी
गेबादी ब, “आव मिँ इताव ज़,
ओयेनर ब इताव ज़ लिऽया,” लिद
काता चिथी सर्द याव उपरिऽयाव
रो? २गेयेन सरै:दचाऽयाव चिथी ते
जेक्याँताव गेदोव येन ज़ लिऽया। नो
चिथी भरी गेयुँल ज़ सर्सिउ लिऽया,
प्राइँए प्ररिधुन्या ब लिऽया। ३है जैद
जे ज़ गेजूनी गेसाची याऽयाव ख्रीसए
सर्द ओयासिउ चिथी। नो चिथी
मसीए सर्सिउ ब मा:क, लुँए फल्यात
खुपिसिउ ब मा:क। जींदो परमेस्वरए
छैव उपरूसनी युँत ज़ सदर्याव
दोऽयाव।

४आव जेजूनी है डालिऽयाव पाँ
भरी ख्रीसनी परमेस्वरए दादचासिवा
ज़ लिद डायुँ हुबो ज़ लिऽया। ५जो
येन तादी ब गेनी ताव है लिद गे है
गेमालिधुइ, परमेस्वरए वाज़ ओयेन
दाधुन्यार जैसिऽयाव। ६गेलाई
सा:रो बाचालाव येन दान्या स्यासोर

जैऽयाव मनी ओल परमेस्वर ज़।
नो बाचा पाखाताव सर्सिउ कानुन
मिताव ते मा:क, परमेस्वरए छैव
उपरूसनी युँल ज़ ताऽया। नो
पाखाताव सर्सिउ कानुनए सिन्याल
भा:ऽयाव, छैव पुरूसए ते अजम्बरी
जुनी यासिऽयाव।

सा:रो बाचाए ओज़गै

७नो डादाडाव सिन्याल भा:ऽयाव
लुँए फल्याताव खुपिसिउ कानुनए
मोसाए ओडा: बनै ज़गै ज़गै ओतावए
नो ज़गै छचावा पै वाज़ उरहिदी ब
इसाएलीर मोसाए ओडा:त माभाल्सि-
धुकेर। ८है जैद नो छैव पुरूसनिकाव
सा:रो ओदोऽयाव ओयेन भन
ज़ ज़गै मगैव कै जैद माताके?
९निताव सिन्या सजाल भा:ऽयाव
कानुन उगुन ल्यो ज़गैव ओताकिन,
परमेस्वरए उयुँलाव मिताव जैव
दोऽयाव सा:रो ते भन ज़ उगुन
ल्यो ज़गै मगैव ताऽयाखेहो सानी।
१०नो सा:रो बनै ज़ ज़गै मगैव
ओतावए डादाडाव ज़गैलाई ओज़गै
समैदिक्यो। ११नो ओज़गै मावलाई
ओज़गै ल्यो है गेदोकिन, नो ओज़गै
माम्नाऽयावलाई भन ज़ ओज़गै ल्यो
है ल्यो परिके।

१२ है जैद नो गेरासथैज्याव सा:रो पाँ गेयुँ हुपद माछे:द ज़ गेरासथैज्या।
 १३ गे नो मोसाए ओडा:ताव ज़गै ओखेम्नादी ब, “इसाएलीराए आव ज़गैत माभाल्सिधुर,” लिद ओडा: कपद ओराएज्याव मिताव गे ते आव सा:रो ज़गैव पाँ कबो मापरिए।
 १४ नोर यायुँ बनै खाव एकोहोज्यासोर यातावए मोसाए ओडा: कपद याएक्यो। आ:पै ब कानुनलाव पाँ यापरिदी ब नोरालाई कप्सिउ मिताव ज़ लिज्या। नो पाँ ख्रीसए ओक्याँत याथ:रैधुकिन वाज़ फैसिज्या।
 १५ खाली नोर आ:पै मोसाए ओसरो पाँ यापरिक काता ज़ मासैन्यार यायुँ कप्सिउ मितावर ज़ लिज्यार।
 १६ प्रभुए ल्योदा युँ फकैकिन वाज़ नो युँलाई मासैन्या जैज्याव कप्सिउ फैसिज्या। १७ प्रभु ते पुरूस ज़। जोए ओक्याँत प्रभुए उपुरूसए बास दाद नैव, नो मिँलाई प्राइँ फैसिउ लिज्या।
 १८ गे ख्रीसए उमिनतावर गेडा: माकप्सिउ मितावर गेतावए प्रभुए ओज़गै सरै:ज्याव धर्पन मितावर गेलिज्या। गेप्रभुए ओज़गै खा गेरै:ज्या, हा:ज़ गे मनी ओल उपुरूसनी ओगेर सरै:दद्याद ओल मिताव ज़ तानाद ज़गैवर गेतानाज्या।

युँलाई पलाँ जैज्याव पाँ
 है जैद गे परमेस्वरए उयुँ ओगराँवनी निताव येन दान्यार गेतावए जो मितावराल तादी ब गेयुँ माके:द ज़ गेदोज्या। २गे मोंसी मोंसी दान्या लाज हुव येनर गेरास्के। परमेस्वरए ओपाँ गेरासथैक गया:तरग रग जैद ससैसिउ पाँर बरे:द गेमारासथैए। बुरू परमेस्वरए ओपाँ किताव उलिज्याव, हितावनी ज़ सथैद परमेस्वरए ओडाक ज़ गेदोज्यावए प्राइँ मिँराए साचो पाँ ज़ ओल्यो लिद यायुँल याज़ थ:रैधुज्यार। ३गे गेरासथैज्याव पाँ ख्वारालाई कप्सिउ मिताव उलिकिन, नो पाँ नर्गलाव येमदा बाज्यावरालाई वाज़ निताव ताज्या।
 ४ आव मानुवा चलैज्याव सैतानए परमेस्वरए ओपाँ माभै:ज्यावरालाई मुन्दुक्यासोर याजैज्याव। है जैद ज़ नोर ख्रीसए ओक्याँताव परमेस्वरए ओगेर सरै:दद्याज्याव ज़गै मगैव परमेस्वरए ओपाँ थैन्या ब माथैधुर, रै:न्या ब मारै:धुर। ५ नो गेरासथैज्याव पाँ गे सघ्यो:सिन्याए जूनी मा:क। येसु ख्रीस ज़ गेप्रभु लिद गेरासथैज्या। होए उमिननी जेयेन दान्यार जैसिद गेले। ६ किताव स्रिस्तील परमेस्वरए



चुम चुमोलाई पलाँ जैक्यो, हिताव ज़
गे गेयुँलाई पाला पलाँ जैद ओल
ओपाँनी ज़ सैव परींसिज़्याव। ननी
ज़ गे ख्रीसए ओक्याँताव सरैःसिउ
परमेस्वरए ओज़गैर ओगेर गेथःरैज़्या।

गमे गेक्याँत परमेस्वरए ओसक्ती

७ख्रीसए ओपाँ गेक्याँत ओतावए
बनै ओएः ल्यो गदान्त गमे जाल
भाःसिउ मिताव लिज़्या। है जैद
परमेस्वरए अचम्बलाव ओयेनर
ओसक्तीर इताव गमे गेक्याँत यारैःक,
“आव ते यानी माःक, परमेस्वरनी
ज़ ओताज़्याव ची ओल्यो,” लिद
प्राइँए थःरैधुज़्यार। ८गे काता
दुखरानी गेधलिदी ब तै मिताव
ते गेमाताए, काताए आस माल्यो
मितावर गेतादी ब गेयुँर ब गेमासतेए,
९मिँर गेखिरी पसिद यासोसिदी ब
परमेस्वर गेस ज़ लिज़्या लिद काता
स्यासो ज़ गेमाडम्सिए, पछारिसिउ
मितावर गेतादी ब खदम ते गेमाताए।
१०येसु सिउनी ओसोव ओसक्ती
गेक्याँत छर्लङ्ग ज़ ओरैःक लिद
येसु उसिज़्याकाव ओदैव दुखर गे
गेक्याँत ब एकम्न्या ताव ज़ लिज़्या।
११गे येसुए ओयेनत आव गेक्याँत
ज़ गेखिरी पसिद दिनकाव ज़ सैःना

यालाँसिज़्याव मितावर गेलिदी ब भन
ननी ज़ आव सिन्या मान्याल गनिसिउ
गेक्याँत येसुनी ताज़्याव खर्क ज़
मासिन्या जुनी सतैंसिउ लिज़्या। १२है
जैद गे परमेस्वरए ओपाँ सथैज़्यावर नो
सिन्या मितावल गेपरिदी ब नो जेजूनी
ज़ ताज़्या। ननी ज़ जे अजम्बरी जुनी
जेदैज़्या। १३किताव नो धर्मसास्त्रलाव
तोबोए, “डायुँ उहुबोए ज़ डापाँज़्या,”
है उलिज़्याव मिताव गे मनी गेयुँ
उहुबोए ज़ गेपाँज़्या। १४गेप्रभु येसुलाई
सिउनी सोचोइज़्याव परमेस्वरए ज़ जे
सोनो गेलाई मनी तछा सोचोइद येसुस
सिप ज़ ओड़ाक जैसिरिज़्याव लिन्या
गेसैँज़्या। १५नो गेक्याँताव ताज़्याव
भरी प्राइँ जेजूनी ज़। ननी ज़ परमेस्वरए
उयुँ ओगराँज़्याव भन कुधुलाई ज़
ओतानावए परमेस्वरए उगुनर चेतैद
उमिन ब ज़गै मगैव ज़ रैःनाज़्या।

दुख उहुदी ब स्वर्गताव पो गेदैज़्या

१६है जैद गे खर्क ज़ गेयुँर गेमा-
सतेए। पाखाताव गेक्याँ उल्यूदी ब,
गेजींलाव गेयुँ ते दिनकाव ज़ साःरो
तानाज़्या। १७काराव ल्यो ताकिन
आव गेजिउत जाँवा पै गेक्याँत दुख
उहुदी ब भन खर्क ज़ माखेम्न्या
स्वर्गताव ज़गै मगैव पो दैन्याकावर



गेताऱ्या। १८ है जैद गे आव गेजिउत पाखाताव गेमीए गेरँ:धुऱ्यावदा गेयुँ थू गेमाजैए, नो भरी ते तछा यामिन ज़ मान्या ले। गेमीए गेमारँ:धुऱ्यावलाई गेयुँ हुपद गेयुँ थू जैद गेनेऱ्याव ते खर्क ज़ खेन्त्या माले।

स्वर्गताव सा:रो गेक्याँ

५ आव मानुवाताव गेसिप पाल उचिस्ऱ्याव मिताव चिस्द ओखेम्दी ब कुइए माताद परमेस्वरनी जैसिउ खर्क ज़ माचिस्न्या गेभिम स्वर्गत लिऱ्या लिद गेयुँ हुबो ज़ लिऱ्या। २ आव मानुवाताव गेसिपल गेलेवा भरी स्वर्गताव सा:रो क्याँ दैन्याए जूनी गेयुँ थू जैद गेनेऱ्यावए गे गहनिउ ज़ गेलिऱ्या। ३ नो सा:रो क्याँ गेदैवत ओक्याँ माल्यो पुरूस स्यासो तान्या गेमाले। ४ आव मानुवाताव दुखरानी गेगहनिऱ्याव नो ओपोऱ्याप क्याँलाई ख्याव गेपैऱ्याव ते मा:क, स्वर्गताव सा:रो क्याँ तान्याए जूनी ची। है जैद आव सिन्यादा बाऱ्याव गेक्याँलाई खर्क ज़ मासिन्याए ओसमैवक है गेलिऱ्या। ५ इताव दैन्या ओल परमेस्वरए ज़ जैद नैदचासिउ। नोए उजूनी ङादा ज़ बैना मिताव छैव उपुरूस ब याद नैसिउ।

६ है जैद गेसार् परीद गेयुँर भे:व ज़ लिऱ्या। आव मानुवाताव गेक्याँस

प्रभुस सिप गेमातादी ब, ७ गेमीए गेमारँ:वलाई गेयुँ उहुबोनी ज़ गेदो-ऱ्यावए, ८ आव मानुवाताव क्याँस लिऱ्याव देखा बुरू प्रभुस सिप लिन्या पाथ लिऱ्या लिद गेयुँर सभे:द गेदोऱ्या। ९ है जैद गेयुँ इताव ब लिऱ्या, आव मानुवाल गेलिदी ब, आनी पुलुस्द गेबादी ब, प्रभुए उयुँलाव मिताव कातानी तान्या लिद उदिम गेदोऱ्या। १० काराव ल्यो ताकिन गे भरी प्राइँ तछा ख्रीसए ओङाक च्याँ:सिद फाल्सिउ परिरिऱ्या। हो छचाम आव गेजिउताव गेदोव, चाव तादी ब, माचाव तादी ब, सु सु गेदोव गेयेननी ज़ गेजेला गेदैरिऱ्या।

मिरालाई परमेस्वरस सखैन्या

११ है जैद गे परमेस्वरनिकाव हुऱ्याव छचासर गेसैऱ्यावए नल तापरिरक लिद मिरालाई सम्जैद गेरासथैऱ्या। नो गेदोऱ्याव भरी जेजूनी ज़ लिऱ्या लिन्या ओल परमेस्वरए ज़ सैऱ्याव। जे मनी जेसैधुकिन ताखेहो है डालिऱ्या। १२ आव भरी जेङाक चाव सतैसिन्याए जूनी मा:क, जेलाई गेगुनर चेतैन्या मौका डयाचिऱ्याव ची। है जैद गे जेजूनी गेदोऱ्याव येननी जे नो युँनी माताद पाखाताव चलननी यानी स०द सघ्यो:सिऱ्यावरालाई थाम थुम जेराजैधुरिऱ्या। १३ नो

गेपाँत गेलाई दासा बिसाव मिताव जेथःरैसिदी ब परमेस्वरए ओमान नैदयान्याए जूनी ज़ गेदोज़्या। फरी गेगहक ल्यो मितावर जेथःरैसिदी ब नो जेजूनी ज़ गेदोज़्या। १४ ख्रीसए मया ओदासिज़्यावए गेलाई मनी ओल ओदोव मिताव येनत घलैसिज़्याव। काराव ल्यो ताकिन तोबोए प्राइँए जूनी उजिउ भाःद ओयासिउए प्राइँ ज़ सिकेर। १५ फरी प्राइँए जूनी उजिउ भाःद ओयासिउए गेलाई वाज़ तान्या भरी रास्द गेजूनी उजिउ भाःद सिउनी सैसिज़्याव ख्रीसए उजूनी बाँचिउ परिए।

१६ है जैद गे पाखाताव रैःन्यानी सुलाई ज़ गेमाराछुतैए। ख्रीसलाई डादा पाखाताव गेबिचारनी गेरैःक जिम्ज़ा ज़ गेथःरैज़्याव, अबकिन ते छुतनी ज़ गेसरेस्ज़्या। १७ है जैद ख्रीसए ओक्याँत ख्यासिद लिज़्याव मिँ चबनै साःरो ताज़्या। नोए डादाडाव उबिचार भरी ओचलन भरी माद, होए ओपोल उयुँल साःरो साःरो बिचारर हुज़्या। १८ आव भरी परमेस्वरनी हुव ज़। ओल ज़ ख्रीसनी गेलाई ओलस सखैसिक्यो। गेलाई ओयासिउ येन मनी छुतरालाई परमेस्वरस सखैन्या ज़। १९ है जैद

गे मिँरालाई गेरासथैज़्याव पाँ आव ज़ — परमेस्वर ख्रीसनी हुद आव मानुवाताव मिँरालाई यापापर चिऊद मायाद ओलस यासखैहुक्यो। नो पाँ सथैन्या फरी ओल परमेस्वरए ज़ गेलाई जैद नैसिउ।

२० है जैद गे मिँरालाई परमेस्वरए ल्योदा खुलन्यात ख्रीसए ओकत्वाल्या मितावर गेलिज़्या। जेलाई ख्रीसए ल्योनी गेबिन्ती लिज़्या — जे परमेस्वरस खैहुचिके। २१ होए गेलाई ख्रीसनी, ओडाक उयुँलाव मिताव गेखत माल्योर जैन्याए जूनी गेदोव पाप भरी कान्त ज़ ओखत माल्यो ख्रीसलाई सुघुदर्चासिक्यो।

६ गे परमेस्वरस सिप येन दाज़्याव-
राए जेलाई है गेदाचिज़्या,
जेल्योदा परमेस्वरए उयुँ ओगराँव
अनाकलाव ताजैच्यो। २ धर्मसास्त्रल
ब परमेस्वरए है लिज़्या,

“डायुँ ओनाव बेलाक ज़

जेपाँ डाथैके,

जेचाहित ओताव छचाम ज़

डासघैचिके।”

है जैद डा जेलाई है डादाचिज़्या,
परमेस्वरए उयुँ ओनाव छचाम ब
आछिम ज़, जेचाहित ओताव छचाम
ब आछिमकिन ज़।

पावलए उदुखर

३गे परमेस्वरए ओयेन दान्यात ओपाँःच्या ल्यो कान्त ज़ ताताक लिद सुलाई ज़ यायुं केःदचान्या येनर गोमादोए। ४बुरू प्राइँ सहिद परमेस्वरए ओसेवा दान्यात सतैँद नैसिउ मितावर गेजैसिज्या। है जैद दुखल तादी ब, अखत्याल तादी ब, धो सहिउल तादी ब, ५गेलीई यारीःसिदी ब, भयाल-खानाल याभाःसिदी ब, भोरोःसिद याभ्याम्सिदी ब, गेदोज्याव येनलाई मारासुद कैताक मास्याँद तादी ब, तुर्द तादी ब, धामास ज़ गेदोज्या। ६है जैद गे बनै छैँव युँस, चाव माचाव सैँद, माचाव भरी गालुद प्राइँए जूँनी ज़ गेदोज्या। परमेस्वरए उपुरूसनी प्राइँए ल्योदा गेयुं थू जैद, ७परमेस्वरए ओसक्तीनी ओपाँ सतस गेरासथैज्या। वोर्फताव गेकुइत सोनो दाबज्याफताव गेकुइत परमेस्वरए ओयेन दान्यात चाहिज्याव हत्यार भरी रैद गेनै। ८गे कैताक बीज्यात मनी गेताज्या, कैताक इज्यात मनी गेदैज्या। फरी कैताक चाव मिन ब हुज्या, कैताक माचाव मिन ब हुज्या। गेलीई छुल्यार है यादासिदी ब साचो ज़ गेथोरिज्या। ९कान्त ज़ मागनिसिउर यारैँःसिदी ब गनिसिउर ज़ गेलिज्या, सिउ मितावर गेलिदी ब बाँचिउ ज़ गेलिज्या, सजा

धूँल यानैसिदी ब गेपोहोन ते माबाए। १०फरी सोगो धूँल गेलिदी ब रेंव ज़ गेलिज्या, काता ज़ माल्यो मितावर गेलिदी ब प्राइँनी योःवर ज़ गेलिज्या, फरी गरीब मितावर गेतादी ब प्राइँ मिँरालाई धनी मितावर गेराजैज्या।

गेलीई जेयुँर फैदच्यसिचिके

११अ कोरिन्थलाव गेनेँ गेमेँर, गेयेन भरी काता ज़ मामोसिद गेदाँजीं ज़ सतैँद गयाचिके। १२खाली गेयुँर फैद गयाचिदी ब जे ते जेयुँर फैव जेमाभैँःके। १३डा जेलाई डाज़ा मितावर जैद डासम्जैचिज्या, गे गेदोज्याव मिताव जे मनी गेलीई जेयुँर फैदच्यसिचिके।

यायुँ माहुज्यावरास मानारिसिन्या

१४जे परमेस्वरलाई यायुँ माहुज्याव-रास तोबो कुमत तानारिसिच्यो। धर्म सोनो अधर्मनी माखैनी, चुम चुमो सोनो पलाँवनी ब माखैनी। १५हिताव ज़ फरी खीस सोनो सैताननी ब माखैनी। है जैद परमेस्वरलाई उयुँ हुबो सोनो उयुँ माहुबोनी कातानी निखैरिज्याव? १६परमेस्वर लिन्या ध्यान फ़िम सोनो मिँए जैसिउ अडग्यानी ब कातानी निखैरिज्याव? परमेस्वर लिन्या फ़िम ओललाई उयुँ हुज्यावए उयुँल ज़ ताज्या। धर्मसास्त्रल ब परमेस्वरए है लिज्या,

“डा जेक्याँत बास दाद जेस ज़
आदा होदा डालिरिज़्या।
डा जेपरमेस्वर ज़ तान्या डाले,
जे डामीर ज़ तान्या जेले।”

१७ है जैद परमेस्वरए है लिज़्या,
“नोराए खानी पुलुस्द जेबातड
लिचिके।

अनाकलाव माचाहिउर काता ज़
जेमाछुकिन,

डा जेलाई डाल्योदा रैद,

१८ डा जेबाबु तान्या डाले,
जे डाज़ार तान्या जेले।

आव है लिज़्याव

डा माहान परमेस्वर ज़।”

७ है जैद डानै डामेर, गे
परमेस्वरए निताव ओयाकार
गेदैवए गेक्याँ गेपुरूसलाई भुथो
जैज़्यावरानी चोखोइसिद परमेस्वरए
उधूँल लिद सतलाव छैव ओयेनदा
बाव ताके।

पावलए उयुँ होलाँ ओताव

२ गेलाई जेयुँल लिन्या पो जैदचाव
ताके, तावैसिच्यो। गे सुए याउपत
ज़ मादान्या गेमादोए, सुलाई ब गेमा-
बलेचिए, सुलाई ब गेमाभुकैचिए।
३ आव है डादाचिज़्याव भरी जेलाई

जेखतर सतैद डायाचिज़्याव ते माःक।
डादाकिन है डालिज़्याव मिताव जे
गेस ज़ गेयुँल सिप ज़ जेलिज़्या। है जैद
गे गेसिदी ब, गेलिदी ब, गेयुँनी तँदा
तान्या जेमाले। ४ जेलाई डायुँ हुण्ड
डासुनी च्याँःसिउ ज़ लिज़्या। है जैद
जो मिताव डादुखराल ब डायुँर होलाँ
ताद रेंव ज़ डालिज़्या।

५ माकेदोनिया गेकेसोत गेदुखराए
सन्चस ल्यो गेमादैके। प्राइनी प्राइनी
गेचर्या सिद पाखाताव गेक्याँ ब
उरूमसिज़्याव, गेयुँल छचास वाज़
उलिज़्याव। ६ हैदी ब यायुँ तेवरलाई
यायुँ सभेंःदचाज़्याव परमेस्वरए
तीतसलाई गेल्योक परीदचाद गेयुँर
होलाँ जैदचासिक्यो। ७ नो होलाँ
गेताव अइज़ गेदैसिउनी वाज़ माःक,
जे नोलाई उयुँर होलाँ जैद जेयोनी गे
गेयुँ ब होलाँ ओताव ची। जे डालाई
मामेंःद जेचेतैनाज़्याव, डादा मादान्या
जेदोवत सोगो जेदोज़्याव, सोनो
डापाँत धुरिदचाद डास जेजैसिज़्याव,
नो पाँर जेल्योनी हुव तीतसए ओयाःनी
डाथैक डायुँर भेंःद भन ज़ डारेंके।

८ आवकिन नो डादाडाव परीद
डायाचिउ चिथील जेयेनए जेयुँर
जाँ माचाव जैद डायाचिउनी, छीनी

‘नो यायुरं माचाव जैदयान्या चिथी डामापरींदी ब तान्या ओल्यो,’ है ब डालिके। खाली डापरींव पाथ ज ताके, नो जेयुरं माचाव जैद डायचिउ छयावाए जूनी वाज ओताव ओल्यो लिन्या डसैके। ६नो डारेंज्याव, जेयुरं माचाव जैद डायचिउनी माःक, जेयुं माचाव जैद परमेस्वरए ल्योदा जेयुं जेफकैवनी डारेंज्याव ची। माचाव जेयेनत जेयुं माचाव जेजैव परमेस्वरए उयुंलाव मिताव ज ताके। नै ओतावए गेल्योनी ब जेलाई कै मै ज माताके। १०परमेस्वरए ल्योनिकाव ताज्याव सोगोए युंलाई त्तोदयाद ओल्योदा लांव दोज्याव। हाःकिन नो सुए ल्योदा ब मागोइसिए। आव मानुवाताव ताज्याव सोगोए ते सिन्या मान्यादा लांव दोज्याव। ११खाली जेलाई ते परमेस्वरए ल्योनिकाव ताज्याव सोगोए काता नाः परमेस्वरए ल्योदा कलं लिन्यार ओजैचिउ। नो सोगोए डादाडाव जेयेन भरिनी छेसिन्या ब जैचिक्यो, मादान्या जेदोवत हार मानिउ ब परीचिक्यो, सजानी छेन्या ब जैचिक्यो, डस खैन्या युं ब जैदयाचिक्यो, चाव येनत जेसा ब पलेदयाचिक्यो, जेलाई सतस दान्या युं जैदयाचिक्यो। है जैद आव भरिनी जेखत माल्योर जेथोरिके। १२नो डादाडाव जेखालाव मादान्या

येन दोवए उजूनी डापरींव चिथी होए उजूनी सोनो जेलाई जेयुं सुहुर्द ओयाचिउराए जूनी वाज माःक। बुरू परमेस्वरए ओडाक गेल्योदा जेयुं थू जेजैज्याव ओरेंःक लिद डसर्के। १३ननी गे गेसंर ब होलां ताके।

गेसंर होलां ओताव नाः वाज माःक, जेल्योनी उयुरं होलां ताद रेंद हुव तीतसस गेदैसिक भन ज गेयुरं भेंःद गेसंर होलां ताके। १४डादा तीतस जेल्योड ओमाहुद नोस जेजूनी जेलाई सघ्योःद डापांव पां भरी अनाकलाव माताके। किताव जेलाई गेसथैचिउ परमेस्वरए ओपां भरी थोरिउ पां ज ओताव, हिताव ज जेजूनी तीतसलाई है डादोव भरी ब जेक्यांत ज थोरिउ ताके। १५तीतसए जेलाई मामेंःचिउ। जेल्योड उहुक बनै मानस जेनैवए, ‘आवर ते परमेस्वरए ओपां दान्याकावर ज ताद यालिज्याव ओल्यो’ लिन्या चेतैद जेलाई भन मया दाचिज्याव। १६है जैद जे प्राइंनी प्राइंनी डायुं हुबोर जेतावए डा रेंव ज डालिज्या।

कुइ सघ्योःद यान्या

डानें डामें, आव ब सैच्यो। माकेदोनियालाव मन्दलीराए याक्यांत परमेस्वरए उयुं ओगरावनी यादोव येनए जूनी है गेदाचिज्या।

२ नोराए याक्यांत धो सहिउ दुखर हुद उलिङ्यावत ब नोराए यायुं मासतेद रेंद, माथेंव मायोःवल लिङ्यावत ब परमेस्वरलाई याकुइ सघ्योःद ज़ यान्यार ताकेर। ३ डा जेलाई साचो है डादाचिङ्या, नोराए यायुं स्यानी ज़ याधुवा भरी ज़ दोकेर, रेंःक ते भन मादासिधुन्या मिताव येन ब दोकेर। ४ परमेस्वरए उमिनताव माथेंव मायोःवरालाई, 'जुनी ब गेल्योनी गे गेजुं ब लाँदचाव ज़ ताके' लिद घलैनाकेर। ५ गे है ल्यो गेपेंज्यावकिन नोराए भन कोसै ज़ दोकेर। नोराए डादा ज़ प्रभुलाई याजिउ ज़ याचरैःवए परमेस्वरए उयुंलाव मिताव येन ज़ दाद गेलाई ब याजिउ ज़ यासुँपिसिउ मिताव ज़ ताके। ६ जे जेल्योड मनी इताव चाव येनर जे जेक्यांत ब घरैःक लिद जेल्योडाव चाव येनत थूसिद लिङ्याव तीतसलाई पुर्थस घुतुपैयो है गेदोङ्या। ७ है जैद जे प्राइं येनत, युं हुण्ण्यात तादी ब, पाँन्यात तादी ब, सैन्यात तादी ब, नो भरित कलं लिद गेल्योदा जेयुं थू जेजैङ्याव मिताव पो पोडाव माथेंव मायोःवरालाई स्योःद गेराएङ्याव येनत जे मनी उहिल हाइव ताके।

८ आव है डालिङ्याव भरी जे मायाद माताए है डादाचिङ्याव ते माःक, खाली छुतडावराए माथेंव मायोःवराए ल्योदा याजैङ्याव युं स्यासो जे जेल्योड

ब मालिङ्या लिद डासङ्याव ची। ९ गेप्रभु येसु ख्रीसए उयुं गेल्योदा ओगराँव जे ब जेसैङ्याखेहो। नो डादा प्राइंनी प्राइंनी योःव उलिदी ब गे गेजुंनी काता ज़ माल्यो जैसिद हुके। गेलाई प्राइंनी योःवर जैन्याए जूंनी गेजुंनी नाःल्दिउ येन दादचासिक्यो।

१० डा जेसकाव डासल्ला इताव लिङ्या, नो डासल्ला जेजुंनी ज़ लिङ्या। जे आःर्तानी मिताव येन दान्या भैंःन्यात तादी ब, यान्यात तादी ब, जे ज़ प्राइरानी डात जेल्यो।

११ अब ते नो जेभैंःव येनलाई सयोःव ज़ परिके। किताव डादा दान्या युं जेदोव, हिताव ज़ जेधुवा भरी दाद नो जेपाँ सयोःव ज़ परिके।

१२ जे यान्या जेपैंकिन जेयुं स्यानी याधुन्या वाज़ दोच्यो। परमेस्वरए नो जेदोधुङ्यावकिन कोसै मारैव।

१३ आव येन जेलाई दुख याद छुतलाई थाँतस नैन्याए जूंनी माःक, प्राइंलाई सम सम जैन्याए जूंनी ची।

१४ आज्याल जे प्राइंनी योःद धोल पोगोल ताद जेलिङ्यावए नो माथेंव मायोःवर ब योःवर ताङ्यार। फरी नोर छींनी प्राइंनी योःद धोल पोगोल यातावत जे माथेंव मायोःवर जेताकिन जे मनी योःवर ज़ तान्या जेले। है जैद प्राइंस सम सम ओताक। १५ हो ताकिन ची धर्मसास्त्रलाव सर्सिउ पाँ

मिताव ज्ञ तान्या ले। नो सर्सिउ आव
ज्ञ,

“कुधु दुपोलाई
अनाकलाव तान्या माले।
फरी छ्या ल्योलाई
मायो·व तान्या माले।”

तीतसलाई कोरिन्थीराए ल्योदा परींसिउ

१६परमेस्वरलाई धन्याबाद लिज्या।
किताव जेल्योदा डायुं थू ओताज्याव,
हिताव ज्ञ परमेस्वरए तीतसलाई
मनी जेल्योदा उयुं थू जैन्या जैक्यो।
१७नो मिं जेल्योदा गे है गेदोवनी
वाज्ज उहुज्याव माःक, जेल्योदा उयुं
थू जैद उयुं स्यानी ज्ञ हुज्या। १८नोस
फरी परमेस्वरए ओयेन दान्यात प्राईं
मन्दलीराए खार्ल उमिन थासो तोबो
गेनै ब गेपरींज्या। १९नो गेनै, माथैव
मायो·वरालाई स्यो·दचान्याए जूनी
पो पोडाव मन्दलीराए ल्योनी आव
येनत गेस सिप ज्ञ खतैसिउ लिज्या।
गे आव गेदोज्याव येन माथैव
मायो·वरालाई कुधु सघैव गेपैंज्या
लिन्या सरैःदचान्याए जूनी सोनो
परमेस्वरए उमिनलाई सघ्योःदचन्याए
जूनी लिज्या। २०आव पो पोडाव
गेस्यो·ज्यावत कान्त ज्ञ गेखत

तापुलुस्क लिद बनै पाथस प्राईंए ड़ाक
ज्ञ गेदोज्या। २१आव येन परमेस्वरए
ओडाक वाज्ज माःक, प्राईं मिंराए
डाक ब ओमान ल्यो मामोंसिन्या येन
ज्ञ गेदोज्या।

२२नोनिस छुत गेभाइ ब जेल्योदा
गेपरींज्या। नो मिं ब परमेस्वरए
ओयेनत उयुं सघ्योःद दोज्याव मिं ज्ञ
गेरैःज्या। आव येनत फरी जेल्योडाव
पांर थैद उयुं हुप्द चह चह ताद
हुज्या। २३तीतस ते डास जेखार्ल
सिप येन दोज्याव डानै ज्ञ। नोस
हुज्याव गेभाइनी फरी, पो पोनिकाव
मन्दलीराए खार्नी परींसिउ, ख्रीसए
ओमान नैदचाज्यावनी ज्ञ। २४है जैद
जे नो सोम्लोराए याडाक माथैव
मायो·वराए ल्योदा जेयुं उलिज्याव
सतैदचाव ताके। हो ताकिन ची आड
जेल्योडाव सघ्योःद गेपां व पां ब
मन्दलीराए साचो थःरैन्या लेर।

जेस्यो·ज्याव युं कैद ताताक

६ परमेस्वरए उमिनतावरालाई
चिऊन्या डा है डामादाचिदी
ब जे ज्ञ जेसैंज्या। २जे अखैयालावर
आःतार्नीकिन ज्ञ थूसिद आव येन
दान्यात अभ्क मनी युं जेदोज्यावए
माकेदोनियालावराए ड़ाक जेमिन



सद्योःद ज़ डापाँज़्या। है जैद नोराए जाँकोसै जे जेदोऽयाव रँःद ज़ दोकेर। ३खाली डा आड सद्योःद डापाँव पाँ भरी अनाकलाव ताताक लिद आव डानैरालाई डाकिन डादा ज़ आव चिथीस जेल्योड डारापरीके। हो ताकिन ची डा नोरालाई है डारादोऽयाव मिताव भाःसिद लिन्या जेले। ४आलाव माकेदोनियालावर मनी जेल्योदा डास याहुकिन जे नड भाःसिद जेमालिऽयाव गेदैहुचि-किन आडाव जेजूनी डापाँव पाँ ओमाथोरिकिन लाज मोर्नो तान्या गेले, जे ब जेलाज हुन्या ले। ५है जैद आव डानैरालाई डादा ज़ परीन्या डाजैके। हो ताकिन ची किताव डादा, “स्योःद धोल पोगोल ज़ गेजैरिऽया,” है जेदाँव मिताव ज़ नोराए गे गेमाहुद ज़ थिक थाक जैन्या लेर। है जैद नो जेस्योऽयाव भिती युँ कैद माःक, युँ स्यानी ज़ ओताक।

कुधु वासोए कुधु ज़ सिम्ज़्याव

६आव ब सैंच्यो, छ्या वासोए छ्या ज़ सिम्ज़्याव। कुधु वासोए कुधु ज़ सिम्ज़्याव। ७है जैद जे मनी आःज़ डाभाःरिऽया लिद जेयुँल ज़ थरैच्यो। खाली नो करस ब ताताक,

युँ कैद ब ताताक। उयुँ माकैद याऽयाव मिँलाई परमेस्वरए मया दोऽयाव। ८परमेस्वरए जेल्योदा उयुँ गराँद जेलाई असिक दैवर जैन्या ओल उकुइत ज़ उलिऽयावए, जेलाई एकमन्या धोल पोगोल ताद माथैवरालाई याधुन्यार तान्या जेले। ९आवए उजूनी धर्मसास्त्रल ब इताव सर्सिउ लिऽया,

“माथैव मायोःवरालाई उयुँ माकैद आदा होदा भाऽयाव,

नोए उगुनर रहिद

खर्क ज़ मामेःसिए।”

१०वास्न्या धुर सोनो ज़्यान्या ज़्यावर जोरैदचाऽयावए नो जेस्योःरिऽयावलाई धुर माँःती सबाःदचाद ननी ज़ धर्मलाव जेयेनर जेगुनर भन ज़ घ्योःन्या ले। ११जेकुइर सद्योःद यान्याए जूनी परमेस्वरए जेलाई योःवर जैचिऽयाव। ननी ज़ फरी नो गेल्योनी जेदोरिऽयाव येनत परमेस्वरलाई धन्याबाद ब चरैःरिऽयार। १२है जैद आव जेदोऽयाव येननी परमेस्वरए उमिनताव माथैव मायोःवरालाई ओरासथैऽयाव वाज़ माःक, परमेस्वरलाई ब कुधु ज़ धन्याबाद दैन्या जैऽयाव। १३नो जेदोव येन ज़ जेसाची तारिऽया। जे खीसए ओपाँ अनाकलाव माजैद जेकुइ सद्योःद जेस्योऽयाव भिती



नोराए यादैवत जेदोज्याव येन साचो थऱैद जेजूनी परमेस्वरए उमिन सघ्योःदयान्या लेर। १४जेक्याँताव परमेस्वरए ओअसिक नोराए ल्योड ब ओतावए नोराए जेलाई मामेंःद जेजूनी परमेस्वरलाई पोंखारिउ ज़ नैन्या लेर। १५गेल्योदा उयुं गराँद, गोइँद ब मागोइँसिधुन्या असिकर याज्याव परमेस्वरलाई बनै धन्याबाद ओताक।

पावलए ओडैत पाँज्यावरालाई जवाप ओरायो

१० डा पावलए डाल्योनी जेस तोबो डाबिन्ती लिज्या, डा ओल ख्रीस मिताव प्राइँत सज़िमिसिद जेस चावनी वाज़ पाँव डापैँज्या। खाली जेनी ख्वा ख्वाराए, “पावल गेस उलिक सुस ज़ मापाँधुन्या छेपोवा स्यासो उलिज्याव, होड बाद ताकितर हाप हाप ख्यान्या स्यासो चिथीर परीँज्याव,” है लिज्यार दी लिन्या डाथैँज्या। २है जैद जेल्योड डाहुक डारिसए हाप हाप ख्यान्या मिताव ताताक। नो जेल्योडावराए डालाई, “आवए ओयेन परमेस्वरनिकाव हुव माःक, मिँए युँ स्यानी पलेःसिउ येन ची,” है दाज्यावराए जूनी ते तखेप डारासिडार्के सैं है डालिज्या। ३आव गेक्याँ मिँनिकाव ओतादी ब मिँए युँ स्यानी गेमाइसिए। ४गे गेहत्यार फरी

मिँए युँ स्यानी जैसिउ माःक, परमेस्वरए ओसक्तीनी जैसिउर ची। नो गेहत्यारनी ज़ छे छे डम्मिसउ गरर तैःन्या गेले। ५ननी ज़ गे मिँए युँ स्यानी ससैसिउ पाँर सोनो परमेस्वरए ओपाँकिन तँदाडाव स०व पाँर पल्लैद यामिनर समैदयाद याबुद्धी यागहकरास ज़ ख्रीसए उधूँल गेराभाःज्या। ६जे परमेस्वरए ओपाँत उघुरिउर जेतावत माउघुरिउ भरिरालाई उघुरिउर जैन्यात भाःसिद लिज्यावर गेताज्या।

७जे जेडाकाव वाज़ रँःन्या माःक। नो जेखालाव, “ख्रीसए उमीर ते गे ची,” है लिज्यावराए यापाँ साचो ज़ लिन्या याथःरैज्याव ताकिन गेलाई मनी या माँःती ख्रीसए उमीर ज़ लिन्या ओथःरैसिरक। ८डा निताव डापाँए प्रभुए ओयाँव हकनी सघ्योःसिद डापाँज्याव मिताव ओरैँःदी ब ननी डालाज माहुइ, जेलाई बलेःन्याए जूनी माःक, जेलाई पाथ पारैन्याए जूनी ची। ९डासज्याव पाँर ब जेलाई हाप हाप ख्यान्याए जूनी माःक। १०हैदी ब जेल्योडाव ख्वा ख्वाराए है लिन्या लेर, “ओचिथीरानी ते बनै छे छे डम्मिसउ कर्रा उलिज्याव मिताव रैँःज्या, खाली गेडाक ते त्यात्या तितिव काम मालागिउ मिताव रैँःज्या।” ११निताव पाँज्यावराए आव ब सैंद ओनैरक, गे आनी गेचिथील

किताव गेपरींज्या, नड हुद गेयेन ब हिताव ज़ तारिज्या।

१२ खाली ख्रीसए ओपाँ सैन्यात 'गेकिन सु ज़ माले' है लिज्यावरास ते गे इताव कान्ल ज़ मागनिसिउर नाः घ्योःवरास गेमादाँजिसिधुइ! निताव याक्याँए याक्याँलाई गोइँद बा बा सोगोइसिज्यावर ते भन काता ज़ मासैन्यार ताज्यार। १३ गे ते परमेस्वरए ओयासिउ गोइँकिन आगल्या ससैद ब गेमापाँए, सघ्योःसिद ब गेमापाँए। बुरू परमेस्वरए ओयासिउ गोइँ भरिल जे ब जेलिज्या। १४ नो जेल्योडाव गेदोव येन परमेस्वरए ओयासिउ गोइँकिन आगल्या माले। जेल्योडाव ख्रीसए ओपाँ सथैवर प्राइँरानी डातावर गे ज़ गेल्यो। १५ जेल्योडाव गेदोव येन परमेस्वरए ओगोइँकिन डाकसै बाद छुतराए याथालिउ पाँलाई तुपैद गेसघ्योःसिज्याव ते माःक। खाली नो जेल्योडाव गेदोव येनरानी जे जेर्युँर भन ज़ हुपद जेल्योनी नो पाँर प्राइँदा राःसिद परमेस्वरए ओयासिउ गोइँ ब जेनी भन ज़ ओघ्योःक लिद जेल्योड आस गेदोज्या। १६ निताव ओताकिन ची जेकिन होदाडाव पो भरिड ब ख्रीसए ओपाँ सथैव दैन्या गेले। ननी ज़ छुतराए याथालिउलाई

गे गेतुपैव मिताव ब तान्या माले, परमेस्वरए ओयासिउ गोइँकिन सघ्योःसिन्या ब तान्या गेमाले। १७ है जैद नो धर्मसास्त्रलाव सर्सिउ मिताव, "जो सघ्योःसिउ पैज्याव, प्रभुनी वाज्ज ओसघ्योःसिक।" १८ ओलनी केर्घे जैसिज्याव मिँलाई प्रभुए माभैःए, ओल प्रभुए ओथःरैव वाज्ज ताज्या।

पावल सोनो परमेस्वरए ओपाँत

घेप्पा जैसिज्यावर

११ यार्ती माल्योराए यापाँज्याव मिताव डापाँर तखेप सहिदचाव ताके। जेसहिया ज़ लिद डायुँ हुबो ज़ लिज्या। २ किताव जेल्योदा परमेस्वरए उयुँ थू ओता-ज्याव, डा डायुँ मनी हिताव ज़ ताज्या। तोबो लुजालाई जिम्जात ज़ निद यानैज्याव मिताव डा मनी जेलाई ख्रीसए उमिनत थामिद छैँवर जैद ख्रीसए तछा लाँन्यार जैद डानैचिए। ३ खाली जेल्योड तोबो पाँत डायुँ माहुबो लिज्या। किताव छुल्या घुलए प्राइँरानी उस०कताव मेंमा हब्बालाई उभुकैव, हिताव ज़ जे मनी कसाराक ख्रीसए ओसतत मालिद बलेस्द तँदा बाज्या लिद डायुँ थू ताद छेःव ज़ डालिज्या। ४ जेल्योड गेकिन छुतर

हुद गे गेसथैचिउ येसुकिन छुत येसुए उजूनी यासथैचिक, सोनो जे जेदैव छैव पुरुसकिन छुत पुरुस मितावर यारैःक, सोनो परमेस्वरए ओपाँकिन छुत पाँर यासथैचिक नो भरी बेहार ज़ तीद बनै जेजम्कैज़्या! ५खाली नो जेल्योडाव घेप्पा जैसिद परमेस्वरए ओपाँत सैन्या जैसिज़्यावराकिन डा ज़िम्ज़ा ते डामालिखेहो। ६पाँन्यात चावस डामापाँधुदी ब सैन्यात ते कान्ल ज़ कम्ती डामाले। निताव डायेन जेल्योड प्राइँनी ज़ सतैद नैद डयाचिए।

७जेल्योड डा सज़िम्सिद जेलाई सघ्योःन्याए जूनी जेल्योनी काता ज़ मारैद परमेस्वरए ओपाँ जेलाई अइज़ डासथैचिउए मादान्या डादोव ते मालिखेहो। ८हो बेलाक जेलाई पाथ पारैन्याए जूनी छुत मन्दलीराए यासघैनाक नोरालाई डारालुतिउ मिताव ज़ ताके। ९डा जेल्योड डालिज़्याव बेलाक डालाई माथैव मायो·वल जेलाई सुलाई ज़ डामाघचैचिए। डालाई नो माथैव मायो·वल माकेदोनियानी हुव गेनै गेमैराए ज़ सयो·दचाँकिर। है जैद जेलाई नो बेलाक ब डामाघचैचिए, आकिन ब घचैन्या डामाले। १०स्त्रीसए साचो ओपाँ डास उलिज़्यावए है डादाचिज़्या, अखैया भरिल सुए ज़ आव सघ्योःसिद

डापाँवलाई वैंधुन्या मालेर। ११नो जेल्योनी काता ज़ डामारैज़्याव जेलाई मया मादाद ते माःक, जेल्योदा डायुँ थू डाजैज़्याव ओल परमेस्वरए ज़ सैँज़्याव। १२डादाकिन डादोज़्याव मिताव मारास्द दाव ज़ नैन्या डाले। हो ताकिन यानी सघ्योःसिद गे मिताव जैसिद लुइसिहुज़्यावराए यायेम ओलनी ज़ सूइसिद थाम थुम तान्या लेर। १३नोर अन्नाकल ज़ स्त्रीसए ओसाची मितावर जैसिद मिँरालाई भुकैद परमेस्वरए ओपाँ बले·द पैज़्यावर ची। १४आव पाँत अचम्ब ताताच्यो। सैतानए मनी मिँरालाई भुकैन्याए जूनी कैताक ज़गैवलाव परमेस्वरए ओचाकन्या मिताव ब जैसिज़्या। १५है जैद नोए ओबाँदार मनी मिँरालाई भुकैन्याए जूनी परमेस्वरए ओयेन दाज़्याव मितावर याजैसिक धर्मी मितावर रैःज़्यार नो काता अचम्बलाव पाँ ज़ माःक। नोराए यासजा यादोव येननी ज़ दैरिज़्यार।

पावल तखेप फदवाल्या जैसिद ओपाँव

१६डा डादा है डादाचिज़्याव मिताव, इताव पाँर डासम्जैचिक त्यात्या तितिव उर्ती माल्यो पाँज़्याव मिताव जेमाजैनाकिन ताखेहो है डालिज़्या। खाली जो मिताव जेजैनादी ब डालाई ते

थिक ज़, जेलाई सम्जैन्याए जूनी आथ पाला तखेप सघ्योःसिद डापाँरिज़्या। १७ आव जेस डापाँरिज़्याव पाँ प्रभुनिकाव हुव ते माःक, तोबो उर्ती माल्योए सघ्योःसिद ओपाँज़्याव मिताव ज़ डापाँरिज़्या। १८ जेल्योडाव पाँज़्याव नितावर यातावए डा ब जेस नितावनी ज़ डापाँरिज़्या। १९ खाली जे निताव सैन्या जैसिज़्यावराए मासैन्याराए यापाँ सहिद जेराएधुज़्याव मिताव आव उर्ती माल्यो डापाँ ब सहिद जेयाँया ज़ है डालिज़्या! २० जे बनै सहिधुन्यार जेलिज़्या। जेलाई माचाहिउ चलन धूँल किद यानैचिज़्याव ब जेसहिज़्या, धुतैद याज्युचिज़्याव ब जेसहिज़्या, सघ्योःसिद जेडैताव याजैसिक ब जेसहिज़्या, मुत्का यासकैचिक ब जेसहिज़्या! २१ डा निताव येनराल नोराकिन काता ज़ मासैन्या मिताव डातावए जेडाक भाल्सिउ डाडाःर ब माले।

है जैद डा ब तखेप नोराए मिताव फदवाल्या जैसिद उर्ती माल्यो डापाँज़्या। २२ नोर, “गे ते हिबू जातलावर ज़,” है लिज़्यार, डा मनी हैज़ डालिज़्या। नोर, “गे ते इस्राएलीर,” है लिज़्यार, डा ब इस्राएली ज़। नोर फरी, “गे ते अब्राहामए ओथोलावर,”

है लिज़्यार, डा ब होलाव ज़। २३ नोर ख्रीसए ओयेन दोज़्यावर रो? डा ते भन होराकिन ब डादोज़्या। आव उर्ती माल्यो डापाँ जेसहिधुया ज़ है डालिज़्या। नोराए काता येन ची दाद नैरदा, नोराकिन डा ते कुधु येन ज़ दाद डानै। नोराकिन भयालखानाल ब कुधु पाला डालिके, कुधु पाला मागनिसिधुन्या रीःसी निन्या ब डाताके, एकतार सिन्या मिताव छचासल ब डालिज़्या। २४ यहूदीराए याकुइनी उनान्चालीस खेप पाँच पाला डारीःसिके। २५ सोखेप भुइए प्रोनाकेर, तखेप लुँए ब भेःनाकेर। रीलाव जहाजल डाबाक ब जहाजर सोखेप फुद तखेप तला तरी भरी रील ज़ डालिके। २६ डा एकमन्या येमत डाबाक कैताक भलए ओछचास ब ताके, कैताक चोरराए छचास ब ताके। कैताक हाप हाप ख्याज़्याव डाजातलावराए खार्ल ब डापरिके, कैताक छुत जातलाव मचिज़्यावराए खार्ल ब डापरिके। नो डापरिज़्याव छचास कैताक सहरल ब ताज़्या, कैताक साइँसुइँवक ब ताज़्या, कैताक समुन्द्रल ब ताज़्या, कैताक ख्रीसए उमिनताव मिताव जैसिज़्यावरास ब ताज़्या। २७ कैताक फरी बनै नाल

क्वाव च्याःसिउ येनर डासहिज्या। कुधु पाला रीर ओव मादैद करे ज़ लिद बिनु क्वा ज्युँःवए भुम भुम गूद डाससँज्या। २८नोकिन भन पो पोडाव मन्दलीराए जूनी डायुँ थू ताद बनै घ्योःव सोगो डादोज्या। २९नोर कैताराक परमेस्वरए उमिनत माथंरिधुद याधलिकिन नो डा डाधलिउ मिताव ज़ ताज्या। कैताराक फरी नोर मादान्या येनराल यापरिक डायुरँ स्यासे तेद वाल्सिवा वाल्सिवा डाताज्या।

३०डा फदवाल्या जैसिन्या ताकिन डादैव दुखराए डालाई यासज़िम्नावनी वाज़ डाजैसिखेहो। ३१आव पाँत धुत डामापाँए, प्रभु येसुए ओबाबु गेपरमेस्वरए ज़ सँज्याव। नोलाई खर्क ज़ माखेम्न्या धन्याकाव ओताक। ३२डा दमस्कसल डालिज्याक ब नलाव राजा अरितसए उधूँलाव हाकिमए डालाई क्योःन्याए जूनी सहरनी पुलुस्न्या येम येमक पाल्यार यानैक्यो। ३३नो बेलाक डानैराए डालाई तोबो भेल भाःद नो सहरलाई बारिसिउ भार्नाताव भ्यालनी मेल भरैनाकेर। है जैद नो हाकिमए उकुइनी डापुलुस्के।

पावलए ओरँःव अचम्बलाव पाँर

१२ डा इताव सघ्योःसिद पाँन्या माचाहिउ येन मिताव

उलिदी ब आथ पाला ते जेजूनी ओचाहित ल्यो ज़ तारिज्या। है जैद प्रभुए डाडाक सरैःद ओयाँव अचम्बलाव पाँर तोबो नेब्लो है डादाचिज्या। २ख्रीसलाई उयुँ हुबो तोबो मिँ चौध बर्स डादा प्राइरानी भेंःव पो स्वर्गत परमेस्वरनी ज़ छीसिद बाके। खाली ओक्याँस ओबाव सँ ओक्याँनी पुलुस्द ओबाव ओताव डा डामासैए, परमेस्वरए वाज़ सँज्याव। ३-४नल सुए खामल ज़ माल्यो अचम्बलाव पाँर थैक्यो। नो स्वर्गत बाव ओक्याँस ओबाव सँ उपरुस ओबाव ओताव डा डामासैए, परमेस्वरए वाज़ सँज्याव। ५नो बाव मिँए उजूनी वाज़ सघ्योःद डापाँज्या, डानी ते डामासघ्योःसिए। डा डाजूनी डापाँज्याव ते ज़िम्जा डारैःवनी वाज़ डापाँज्या। ६सघ्योःसिद डापाँदी ब नो पाँ थंरिउ ओतावए उर्ती माल्यो डामाथंरिए। खाली मिँराए डाक्याँताव याथैज्याव यारँःज्यावकिन चाःसिउ ताताक लिद आगल्या डामापाँए।

परमेस्वरए ओसक्तीर पावलए
ओक्याँत रैःज्या

७नो डादा डारँःव पाँर बनै अचम्बलावर यातावए, डालाई नो पाँरानी तासघ्योःसिक लिद परमेस्वरए डाक्याँलाई ख्योःन्या तोबो जु

मिताव याद नैनाव। ननी डालाई सैतानए ओचाकज्याए दिनकाव ज़ ओख्यो-नाज्याव मिताव लिज्या। ९आव दुख डाक्याँनी उपुलुस्क लिद प्रभुलाई सोखेप बिन्ती डाचरै:के। ९खाली प्रभुए डालाई, “डायुँ नल्योदा याल्द डासघैनिज्याव नँस धोल पोगोल ज़ ताज्या। डा डासक्ती मिँराए यामादोधुज्यावल ज़ रै:ज्या,” है दाँक्यो। है जैद ख्रीसए ओसक्ती डाक्याँत ज़ ओरै:क लिद डानी डामादोधुज्याव पाँलाई सघ्यो:न्यात डालाज माहुद खुसीस डापाँज्या। १०है जैद डा ख्रीसए ओयेनत डार्सा ओमालिदी ब, डालाई बीज्यात याजैनादी ब, डाखिरी पसिद दुखर यायाँदी ब, उस्किउ मादैन्या मिताव-राल डापरिदी ब नो भरिल रेंव ज़ डालिज्या। निताव डार्सा माल्योल ज़ भन परमेस्वरए ओसक्तीर डाक्याँत ज़ रै:ज्या।

काराव जेयुँल सिल्द जेनैनाज्याव?

११डा निताव फदवाल्या डाजैसिउ जे जेघलैनावनी ज़ सानी। खास नो डापाँव पाँर थ-रैद डादोव येन सघ्यो:दचाव परिन्यार ते जे जेल्यो। डा कान्ल ज़ मागनिसिउ मिताव डालिदी ब नो स०द सघ्यो:सिद ख्रीसए ओहक दैव जैसिज्यावराकिन

डा कान्त ज़ जिम्ज़ा डामाले। १२डा जेल्योड डालिज्याक ब ख्रीसए साचो ओसाचीए सतैव परिन्या अचम्बलाव येनर, अचम्बलाव सरेसर बनै धामास ज़ डादोके। १३जे पो पोडाव मन्दलीराकिन कातार छ्या जेदैव मिताव जेडम्सिज्याव? सै जेल्योनी काता ज़ मारैद डादोवनी जेयुँ उहुज्याव? हिताव ताकिन काराव डालाई जेयुँल सिल्द जेनैनाज्याव?

१४आथ पालाकाव हुव डापैज्यावस जेल्योड हुन्या सोखेप तारिके। आथ पाला ब कान्त ज़ घचैन्या डामाले। डा जेस लिज्याव जेसम्पतीर डाखिम्हुज्याव मा:क, जेलाई वाज़ डाखिम्हुचिज्याव ची। याज़ाराए याबाबु याआमाराए जूनी मादुप्, याबाबु याआमाराए ची याज़ाराए जूनी दुप्। १५है जैद डा मनी जेजूनी डाजिउए मया मादाद डास लिज्याव भरी खेम्द तादी ब डाक्याँलाई सख्यूद तादी ब रेंद ज़ डादोज्या। जेल्योदा डायुँ थू ताद ना:काव डादोवनी जे डागुन छ्या ज़ जेरै:ज्याव रो? १६हैज़ जेलिकिन्दा हैज़ लिज्याचिके, डा दासर जेल्योनी खर्क ज़ कातार रैद डामाघचैचिए जे ज़ जेसैज्या। सै बाथो जैसिद तँनी भुकैद डाहाइचिज्याव जेथ-रैनाज्याव? १७नो जेल्योदा डारापरींवर जेलाई हाइद ज्यान्याए जूनी डारापरींव ते मा:क।

१८ डा तीतसलाई ओनैस जेल्योदा डानिपरींक मनी जेलाई कातार हाइद माज्युखिनिहो। तीतसस गिनयुं तोबो ज़ लिज़्या, तोबो युंनी ज़ गिन्दोज्या।

जेल्योड डाहुक सुस ज़ डारिस चोव ताताक

१९ डानै डामेर, आव गेपाँर जे गेपाहा भ्नाःद जेयासिउनी भेंःसिउ गेपैज़्याव ते माःक, आव पाँर परमेस्वरण ओड़ाक ख्रीसस लिद जेलाई पाथ पारैन्याए जूनी गेपाँज़्याव ची। २० खाली डा जेल्योड डाहुक डायुंलाव मितावर जेमाताए सैं लिद जाँ डाछे-ज़्या। हिताव ताकिन ते डा मनी जेयुंलाव मिताव डामाताए सैं। जेखाल इंसिन्या, अर्काए ओक्याँत मी तून्या, रिस चोन्या, क्याँलाई तान्या वाज़ खिम्या, अर्काए उछीनी पाँद उमिन बले-दचान्या, सन्द सध्योःसिन्या, सुस ज़ माखैव तान्या, नितावर जेले सैं लिन्या डाडम्सि-ज़्या। २१ जेल्योड डाहुक परमेस्वरण ओड़ाक जेलाई रँःद लाज मोर्नो डाताए सैं लिन्या छचास ब लिज़्या। नो डादाकिनकाव जेल्योडाव फुरी येन दाद पातन्या पातर्नी जैसिज़्यावर, जोत ब यायुं मानैधुद मादान्या येन दावर परमेस्वरण ल्योदा यायुंर माफकैद

हिताव ज़ यालिकिन डासोगोए भुतुक तान्या डाले।

आथ पाला बाँखी नैन्या डामाले

१३ डा जेल्योड डाहुव आथ पालाकावस सोखेप ताज़्या। है जैद आव धर्मसास्त्रलाव पाँ ब सैंद नैच्यो, “काता गोहाईराल नेब्लो सोम्लोए यासाची ओखैकिन नो पाँ ज़ थ०रिउ ताज़्या।” २ आथ पाला जेल्योड माहुद ज़ डादाडाव डाहुकाव है डादाचिउ मिताव फरी ब है डादाचिज़्या, डा जेल्योक डाहुक नो डादाकिनकाव पाप दाज़्यावर सोनो छीनी दोवरालाई ब हिताव ज़ यालिकिन नोरालाई बाँखी नैन्या डामाले। ३ हो ताकिन ची डाक्याँताव जेखिमज़्याव मिताव ख्रीसए ओसक्तीलाव सरेशर रँःन्या जेले। नो बेलाक ज़ डास लिद पाँज़्याव ख्रीस जेल्योदा ओर्सा माल्यो मिताव माताद, बनै ओर्सा ल्यो तान्या ले। ४ ख्रीस कुसत तङ्गैसिद ओर्सा माल्यो मिताव ताद उसिदी ब, ओसोवत परमेस्वरण ओसक्तीर दैद बाँचिउ ज़ लिज़्या। है जैद गे ख्रीसस लिज़्यावर मनी गेर्सा गेमिन माल्यो मितावर गेलिदी ब, गे ख्रीसस सिप ज़

परमेस्वरए ओसक्तीर दैद जेल्योदा
गेहक गेचलैरिऱ्या।

जे जेल सुधारैसिउ ताके

५जे परमेस्वरए ओपाँत जेलिऱ्याव सैं
जेमालिऱ्याव जे ज़ जाँचिसिउ ताके।
निताव जेजाँचिसिक येसु ख्रीस जेस
उलिऱ्याव सैंव परिके। जेमासैकिन
परमेस्वरए ओपाँतावर जेमाताए।
६गेलाई ते ‘परमेस्वरए ओपाँत काम
लागिउर ज़’ जेथरैसिऱ्याखेहो है
गेलिऱ्या। ७जेल्योड माचाव येन काता
ज़ तापुलुस्क लिद परमेस्वरलाई
पोंखारिउ ज़ गेनैऱ्या। जेल्योडाव गेयेन
ओफाबिउ घरऱःरक लिद गेपोंखारिउ ते
माःक, गे सुए याडाः यामील गेमाहुदी
ब चाव येन घदोरक लिद ची। ८गे
जो मिताव गेरैःदी ब परमेस्वरए साचो
ओपाँलाई गेमाबलेःधुइ, किताव
लिऱ्या हितावनी ज़ गेदोऱ्या। ९गे
सुए याडाः यामील गेमाहुदी ब जे
परमेस्वरए ओपाँत बनै थंरिउर
चावर जेताकिन गे खुसी ज़ गेलिऱ्या।

या याल ज़ उसुधारैसिरक लिद जेजूनी
पोंखारिउ ज़ गेनैऱ्या। १०आव पाँ
डा डामाहुद डादा ज़ सर्द डापरीऱ्या।
हो ताकिन ची जेल्योड डाहुक प्रभुए
ओयाँव हकरानी जेल्योदा कर्रा जैसिउ
परिन्या माले है डालिऱ्या। नो प्रभुए
ओयाँव हकर बलेःन्याए जूनी माःक,
बनैःन्याए जूनी ची।

जेरो दान्या पाँर

११डानैं डामेर, प्राडरानी छीनीकाव
डापाँ आव ज़ — बलेसोर थिक थाक
जैद जेयुँर होलाँ जैच्यो। जे भरी प्राडँ
तयुँ जैद खैद लिच्यो। हो ताकिन
ची गेल्योदा उयुँ थू जैद गेयुँर होलाँ
जैदचाऱ्याव परमेस्वर जेस ज़ तान्या
ले। १२जे जेल मयासं जेरो दासिच्यो।
१३आडाव परमेस्वरए छैँव उमीराए
मनी जेरो है दाचिऱ्यार।
१४जे जेल्योदा गेप्रभु येसु ख्रीसए उयुँ
ओगराँक, परमेस्वरए उयुँ जेल्योदा
ओताक, गेलाई तोबो जैऱ्याव छैँव
पुरूस ब जेस ओताक।